

大明會典

大明會典卷之二十

戶部七

戶口二

黃冊

國初令中書省臣凡行

郊祀禮。以天下戶口賦籍。陳于臺下。祭畢。收入內庫。藏之。其重如此。後著為成式。每歲類報總數。十年攢造黃冊。以定賦役。覈隱漏。清逃亡。法例甚詳。具列于後。

凡攢造黃冊。洪武十四年

詔天下府州縣編賦役黃冊。以一百一十戶為里。

推丁多者十人為長。餘百戶為十甲。甲凡十人。歲役里長一人。管攝一里之事。城中曰坊。近城曰廂。鄉都曰里。凡十年一周。先後則各以丁數多寡為次。每里編為一冊。而首總為一圖。鰥寡孤獨不任役者。則帶管於百一十戶之外。而列於圖後。名曰畸零冊。成一本。進戶部。布政司及府州縣各存一本。○二十四年。奏准。攢造黃冊。格式有司。先將一戶定式。謄刻印板。給與坊長。廂長。里長。并各甲首。令人戶自將本戶人丁事產。依式開寫。付該管甲首。其甲首將本戶并十

戶造到文冊。送各該坊廂里長。坊廂里長各將
甲首所造文冊。攢造一處。送赴本縣。本縣官吏
將冊比照先次原造黃冊查算。如人口有增。即
為作數。其田地等項買者從其增添。賣者准令
過割。務不失原額。排年里長。仍照黃冊內原定
人戶應當。設有消乏。許於一百戶內。選丁糧近
上者補充。圖內有事故戶絕者。於畸零內補轉。
如無畸零。方許於鄰圖人戶內接補。其上中下
三等人戶。亦照原定編排。不許更改。果有消乏
事故。有司驗其丁產。從公定奪。仍於各文冊前

面本縣照依式樣類總填圖。所在有司官吏里甲。敢有圍局造冊。科歛害民。或將各處寓到如式無差文冊。故行改抹。力蹬不收者。許老人指實連冊。綁縛害民吏典。赴京具奏。犯人處斬。若頑民粧誣排陷者。抵罪。若官吏里甲。通同人戶。隱瞞作弊。及將原報在官田地。不行明白推收過割。一槩影射。減除糧額者。一體處死。隱瞞人戶。家長處死。人口遷發化外。○凡編排里長。務不出本都。且如一都有六百戶。將五百五十戶編為五里。剩下五十戶。分派本都。附各里長名。

下帶管當差。不許將別都人口補轆。其畸零人戶。許將年老殘疾并幼小十歲以下。及寡婦。外郡寄莊人戶。編排。若十歲以上者。編入正管。且如編在先次十歲者。今已該二十歲。其十歲以上者。各將年分遠近編排。候長一體充當甲首。其有全種官田人戶。亦編入圖內輪當。○凡冊式內定到田地山塘房屋車船各項款目。所在官司有者依式開寫。無者不許虛開。若類縣總都總收除項下。止許開寫人丁事產總數。不必備開花戶。其州縣將各里文冊類總填圖完備。

仍依定式。將各里人丁事產攢造一處。另造類冊一本。於內分豁各鄉都人丁事產總數。正官首領官吏躬親磨算查對相同。於各里并本州縣總冊後書名畫字用印。解赴本府。其提調正官首領官吏於各州縣造到文冊。躬親檢閱磨算相同。本府依定式另造總冊一本。於內分豁各州縣人丁事產總數。并州縣造到各項冊後一體開寫年月書名畫字用印。直隸府州本府委官一員率各州縣提調造冊官吏親齎其布政司所轄府州。仍申解布政司。本司官吏躬親

檢閱磨算相同。依式類造總冊一本。於內分謄各府州人丁事產總數。於各府州造到總冊後。填寫年月書名畫字用印。委官一員率各府州縣官吏親齋俱限年終進呈。○凡菴觀寺院已給度牒僧道。如有田糧者。編入黃冊。與里甲納糧當差。於戶下開寫一户。某寺院菴觀某僧某道。當幾年里長甲首。無田糧者。編入帶管畸零下作數。○凡黃冊字樣皆細書。大小行款高低照坐去式樣。面上鄉都保分等項照式刊印。不許用紙浮貼。其各州縣每里造冊二本。進呈冊。

用黃紙面布政司府州縣冊用青紙面○二十六年定凡各處戶口每歲取勘明白分豁舊管新收開除實在總數縣報於州州類總報之於府府類總報之於布政司布政司類總呈達戶部立案以憑稽考仍每十年戶部具奏行移各布政司府州縣攢造黃冊編排里甲分豁上中下三等入戶遇有差役以憑點差若有逃移者所在有司必須窮究所逃去處移文勾取赴官依律問罪仍令復業○景泰二年奏准凡各圖人戶有父母俱亡而兄弟多年各爨者有父母

存而兄弟近年各變者。有先因子幼而招贅。今子長成而婿歸宗另變者。有先無子而乞養異姓子承繼。今有親子而乞養子歸宗另變者。俱准另籍當差。其兄弟各變者。查照各人戶內。如果別無軍匠等項役占規避窒礙。自願分戶者。聽。如人丁數少。及有軍匠等項役占窒礙。仍照舊不許分居。○凡各里舊額人戶。除故絕并全戶充軍不及一里者。許歸併一里當差。餘剩人戶。發附近外里轉圖編造。不許寄莊。若有詭立姓名者。許首告改正。其有自願賣與本處人民

為業除豁寄莊戶籍者聽。若違例寄莊者所在有司拘問。田地入官。其軍衛官下家人。旗軍下老幼餘丁。畱置附近州縣田地。願將人丁事產於所在州縣附籍納糧當差者聽。○凡各處招撫外郡人民在境居住及軍民官員事故改調等項遺下家人弟男子姪置有田地。已成家業者。許令寄籍。將戶內人丁事產報官編入圖甲。納糧當差。仍於戶下註寫原籍貫址。軍民匠竈等戶。及今收籍緣由。不許止作寄籍名色。如違所在官司解京發口外充軍。田產入官。○凡攢

造黃冊。如有姦民豪戶。通同書手。或詭寄田地。飛走稅糧。或瞞隱丁口。脫免差徭。或改換戶籍。埋沒軍伍匠役者。或將里甲那移前後應當者。許自首改正入籍。免本罪。其各司府州縣委官。并當該官吏。提督書算從實攢造。仍先以提調委官。并書算姓名貫址。造冊一本。繳部。如有似前作弊者。事發問罪充軍。○三年。令各處攢造黃冊官吏里書人等。捏甲作乙。以有為無。以無為有者。事發所在法司解京。並發口外為民。○天順五年。奏准。各處流移人戶。及軍民官員事。

故遺下家人。先年編成里甲。開墾荒地。為業已久者。各府委官丈量。俱照輕則。每畝起科秋糧米三升三合。草一斤。造入黃冊。納糧當差。如仍寄籍及不附籍者。解原籍復業。田產入官。凡各司府州縣總冊。各委官吏親齎進呈。其各里文冊。另差官徑送南京戶部。○弘治四年。奏准。先年造冊之時。有將丁口漏報。或稅糧詭寄。戶籍那移者。許先行備開緣由。自首本管州縣。申詳合于司府。查對相同。明白改正。免罪。其官吏里書人等。如有通同作弊。照例問罪。造冊完日。州

縣各計人戶若干填寫帖文各一紙。後開年月。并填委官里書人役姓名。用印鈐蓋。申達司府知會。給發各戶親領執照。使知本戶舊管新收開除實在丁糧各若干。憑此納糧當差。下次造冊。各戶抄謄似本。開報州縣。以為憑據。○十三年。令攢造黃冊。係軍戶者。務備開某戶某人。及於某年月日。為某事發充某衛所軍。其有事故等項。亦備細開具。以便查考。○正德六年。奏准排年里長僧道有田糧者。編入黃冊。同里甲納糧當差。無糧者。編入帶管畸零。世家大族規避。

重差花分小戶者許令首改歸併○十五年議
准今後攢造里甲止據人戶丁產見存官第其
等則如或本里人戶不數十甲之數就於附近
里內人戶撥補完足若分析戶籍不問本里他
圖本圖果有消乏亦許還併○嘉靖九年題准
各處州縣查審消乏里分不成甲者驗其丁產
歸併務使一十一戶為一甲○十年令巡按御
史備行布政司及南北兩直隸府州縣今次黃
冊照依舊式穿甲攢造違者聽後湖管冊官查
究○四十一年令大造黃冊完解後湖之日管

冊官即會大數繕寫首列

祖宗以來戶口田土稅糧總數繼開今日總數務期簡校進獻

御覽在湖庫匠舊止一百一十名。各庫冊雖及二年。難以曝晾一周。今後每一大造庫房三十間。量加四十二名。聽將查冊書手分派。每書手二名。領匠八名。將庫冊清曝周而復始。永為定規。有作弊毀裂冊籍等項。比棄毀制書律論。

凡查造委官。正統十二年奏准。南京戶部清查各處黃冊。於國子監取監生四十名。戶部委官

一員提督另騰查對發各該司府州縣對款改造。差吏徑送南京戶部。仍類造改過總冊一本送部查考。差錯官吏人等查提問罪。○弘治三年奏准各處大造黃冊俱責成分巡分守知府正官其州縣監造官不拘正佐但推選行止端莊年力精銳幹辦明敏者專管仍先令里書抄寫原本舊管父監造官即拘排年里甲親供似冊供詞細開人口正耗稅糧出入戶籍緣由其有舊本宿弊許自首改正免罪。監造官叅詳考訂攢造冊稿然後別選諳曉書手依稿騰寫定

限二三月完送本府。知府親自磨對。仍拘原供排年里甲。覆審明白。申送分巡分守處。辨驗印封類解。如經該官吏不用心查對里書。故將原冊改抹。致有丁口增減。由糧飛走戶籍錯亂者。本犯發附近衛所充軍。里書發口外為民。若干礙監造官員。亦治以枉法重罪。其黃冊字俱照題本字樣。真楷書寫。事完。選委司府官員率領各屬經該官吏。定限年終到部。送後湖查考。中間查有洗改字樣。過違限期。先將差來人問罪。若事干軍伍稅糧重情。一體查究。照例處治。其

黃冊俱用厚紙背面如法裝釘仍於冊內鄉都
圖里之上書寫某府州縣里保軍民匠竈等籍
易於查究○嘉靖九年題准吏部將浙江等十
三布政司官每司各推一員疏名上請及行南
北直隸撫按官會推所屬佐貳官每府州各一
員疏名上聞各提調督理大造黃冊不許別項
差占仍降

勅各該委官以便行事若有紙張粉飭差錯稽遲
等弊俱聽後湖管冊官指名叅究不分已未陞
遷俱照例以罷軟黜退

凡免造地方。洪武二十四年奏准。凡雲南各府
攢造黃冊。除流官及土官。馴熟府分。依式攢造
外。其土官用事邊遠頑野之處。里甲不拘定式。
聽從實編造。貴州宣慰司不造。播州宣慰司。附
近通漢語者編造。其餘夷民不造。○景泰六年
奏准。四川威州并保縣極邊番夷黃冊免造。

賦役

國初因賦定役。每十年大造黃冊。戶分上中下三
等。差役照冊僉定。迨法久弊生。

歷朝每有釐正更創。如銀差力差。聽差十段錦。一

條鞭及南北派田之異其例畧見於後

凡審編賦役洪武三年令各處軍民凡有未占籍而不應役者許自首○十七年令各處賦役必驗丁糧多寡產業厚薄以均其力違者罪之○十八年令有司第民戶上中下三等為賦役冊貯於廳事凡遇徭役取驗以革吏弊○二十一年令稅課司局巡欄止取市民殷實戶應當不許僉點農民○二十四年令寄莊人戶除里甲原籍排定應役其雜泛差役皆隨田糧應當○又令在外布政司按察司府州縣官俱給官

錢買馬。市民輪流看養。○二十六年定。凡各處有司。十年一造黃冊。分豁上中下三等。人戶。仍開軍民竈匠等籍。除排年里甲依次充當外。其大小雜泛差役。各照所分上中下三等。人戶點差。○三十一年。令各都司衛所在管軍士。除正軍并當房家小。其餘盡數當差。○正統五年。令各府州縣。每歲查見在人戶。凡有糧而產者。及有丁而家貧者。為貧難戶。止聽輕役。○景泰元年。令里長戶下空閒人丁。與甲首戶下人丁一體當差。若隱匿者。許甲首首告。○又令各處有

司馬夫。二十丁買馬。十丁養馬。俱於市民僉充。

○成化元年奏准。今後清理軍匠外。其餘一應事情糧差等項。止令該年里甲。與同老人結勘催辦。不許拘擾。十年里甲。○六年。令有司馬夫。不許占役。丁多富戶。及辦納月錢。○十五年。令各處差徭。戶分九等。門分三甲。凡遇上司坐派買辦採辦。務因所派多少。定民輸納。不許隔年通徵銀兩在官。○弘治元年。令各處審編均徭。查照歲額差使。於該年均徭人戶。丁糧有力之家。止編本等差役。不許分外加增。餘剩銀兩。貧

難下戶并逃亡之數聽其空閒不許徵銀及額外濫設聽差等項科差違者聽撫按等官糾察問罪奏請改調不舉者坐罪鎮守衙門不許干預均徭○又令在京事故校尉力士幼軍廚役隨住人口照回當差其有在京潛住冒頂軍匠者遞回○五年令順天府所屬人民有私自投充陵戶海戶及勇士校尉軍廚躲避糧差者除本役外其戶下人丁照舊納糧當差○七年令布按二司及各府官馬夫於所屬州縣各僉中等三丁人戶十戶共出銀四十兩解送掌印官

處分給各官自行買馬餵養其州縣者於隔別
府分僉充亦徵銀解送各掌印官分給買馬餵
養○十三年奏准各布政司并直隸府州掌印
官如遇各部派到物料從公斟酌所屬大小豐
歉坐派若豪猾規利之徒買囑該吏妄稟偏派
下屬承攬害民者俱問發附近衛所充軍各該
掌印官聽從者叅究治罪○嘉靖六年令撫巡
等官查考各州縣有令見年里甲本等差役之
外輪流直日分投供給米麩柴薪油燭菜蔬等
項及遇親識往來使客經過任意攤派下程陳

設酒席饋送土宜添撥脚力者率問罷黜若二
司官縱容不舉撫按官以罷軟開報○又今近
京地方新添白地買地等項銀兩巡按官通行
查明即便停革○九年令各該司府州縣審編
徭役先查歲額各項差役若干該用銀若干黃
冊實在丁糧除應免品官監生生員吏典貧難
下戶外其應役丁糧若干以所用役銀酌量每
人一下由幾畝該出銀若干儘數分派如有侵
欺餘剩聽差銀兩入已者事發查照律例從重
問擬○十五年題准今後凡遇審編均徭務要

查照律例申明禁約。如某州縣銀力二差原額各該若干。實該費銀若干。從公查審。刊刻成冊。頒布各府州縣。候審編之時。就將實費之數。編作差銀。分為三等九則。隨其丁產量差重輕。務使貧富適均。毋致偏累。違者糾察問罪。○十六年議准。將昌平州歲派各項差銀一千五百四十九兩有零。於內量減三分之一。通融分派順天府所屬州縣。以補原額之數。○十七年。令遼東各衛所徭役。照依腹裏地方。五年一次審編。○三十七年。奏准。天下正賦戶給青由。先開田。

畝糧石。仍分本色金花折銀。使民周知輸納。其
一時加派。不得混入。亦不分官員舉監生員吏
戶人等。一例均派。另給印信小票。與民執照。事
畢停止。○四十年奏准。河南均徭庫子。擇殷實
有力者。朋充協濟。掌印官置空白文簿二扇。赴
巡按衙門。用印鈐蓋。發各役收掌。遇派辦一應
公費。照數登記。聽巡按及守巡官吊查。至于各
倉斗級。俱今年終交盤。其後收支。皆見役承當。
毋得牽繫舊役。○又令

內府各監局司庫等衙門。將各匠役。定以一萬七

千一百名。錦衣衛各旗校定以一萬六千四百名。光祿寺廚役定以三千六百名。太常寺廚役定以一千一百名。各為額數。如有事故止許在冊餘丁查補不得踰數濫收。○四十四年議准江南行十段錦冊法。算該每年銀力差各若干。總計十甲之田派為定則。如一甲有餘則留二甲用。不足即提二甲補之。鄉官免田十年之內止免一年。一年之內止于本戶。寄莊田畝不拘同府別府。但已經原籍優免者不許再免。○又令凡流寓客丁。查入版籍。協濟均徭。酌派丁

糧○隆慶元年。令黃甫川等處河道通行造船
二十隻。每隻該用水手四名。於葭州神木府谷
吳堡米脂綏德等州縣增入徭規。照船僉派。每
名准免徭銀四兩。如隔越稍遠。情願徵銀代募。
亦從其便。○四年題准。江西布政司所屬府州
縣各項差役。逐一較量輕重。係力差者。則計其
代當工食之費。量為增減。係銀差者。則計其扛
解交納之費。加以增耗。通計一歲共用銀若干。
照依丁糧編派。開載各戶由貼立限徵收。其徭
年編某為某役。某為頭戶。貼戶者。盡行查革。如

有丁無糧者編為下戶。仍納丁銀。有丁有糧者編為中戶。及糧多丁少與丁糧俱多者編為上戶。俱照丁糧併納著為定例。此一係鞭法之始
凡優免差役。洪武元年

詔民年七十之上者許一丁侍養。免雜泛差役。○二年。令凡民年八十之上。止有一子。若係有田產應當差役者。許於雇人代替出官。無田產者許存侍丁。與免雜役。○三年。定凡民間寡婦三十以前夫亡守志。至五十以後不改節者。旌表門閭。除免本家差役。○四年。令免闕里孔氏子

孫二十六戶徭役○又令各府縣軍戶以田三頃為率。稅糧之外悉免雜役。餘田與民同役○七年。令山東正軍全免差役。貼軍免百畝以下。餘田與民同役○又令官員亡故者免其家徭役三年○十三年。令六部都察院。應天府并兩縣判祿司儀禮司行人司。隨朝官員除本戶合納稅糧外。其餘一應雜泛差役盡免。又各處功臣之家。戶有田土。除合納糧草夫役。其餘糧長里長水馬驛夫盡免。鳳陽揚州二府及和州民畜養馬一匹者免二丁○十六年。令鳳陽臨淮

二縣民免雜泛差役○永樂八年令各處軍衛有司軍匠在京充役者免家下雜泛差役○九年令自願徙北京為民及免杖而徙者免徭役五年徙派而徙者免徭役三年○二十二年令天壽山種樹人戶免雜泛差役○宣德元年令天地壇壇戶免雜泛差役○三年令迤北回還軍餘民人收充御馬監勇士者免其原衛原籍戶下人丁差役○四年令各衛所軍每一名免戶下一丁差役若在營有餘丁亦免一丁供給○正統元年令先聖子孫流寓他處及先賢周敦頤

程顥程頤司馬光朱熹之嫡派子孫所在有司
俱免差役○四年令雲南土馬軍自備鞍馬兵
器糧食聽征者免本戶差役四丁○六年令陝
西土軍優免五丁餘聽科差○七年令天文生
陰陽生俱免差役一丁其陝西土軍土民餘丁
若戶丁有在邊操備者亦免雜泛差役○十年
令監生家免差役二丁○十一年令交趾老疾
致仕官員遺下妻子家人許於所在官司入籍
不拘丁數俱待本官故後三年當差子孫家小
入籍者撥田耕種亦待三年後當差○十二年

令雲南土官四品以上優免一十六丁。五品六品一十二丁。七品十丁。八品九品八丁。雜職六丁。其餘人丁俱另立籍與民一體當差。○景泰元年令各處操備民壯戶內每名免三丁。雜泛差役。○成化二年令宛平昌平二縣墳戶免雜泛差役。○弘治元年奏准。

親王王親雜役免二丁

郡王王親一丁。鎮國等將軍夫人親父一丁。昌平縣墳戶等戶免三丁。不許全戶優免。○又令京城大夫御馬監養馬勇士除本身免二丁。其餘

與不係養馬者見丁編當尚膳監光祿寺廚役
將軍力士轎夫旗校寡婦吏典并御用監司禮
監銀作局高手匠役俱免本身其餘見丁編當
軍民諸色人等并賃房諸色人等見丁編當凡
火夫總甲一年一次以有家業行止者充當○
十三年令免光祿寺酒戶差役二丁其有消乏
者除豁僉補○十五年令陵戶海戶墳戶廟戶
壇戶園戶瓜戶果戶米戶藕戶窯戶羊戶每戶
俱量留二三丁供役其餘丁多者悉查出當差
如有投充影射者發邊遠充軍○十八年議准

見任及以禮致仕官員照例優免雜泛差徭。其
為事為民充軍等項回籍官員起蓋鋪面。貨與
軍民。照例提鈴做夫。不許妄行優免。○又議准。
辦納鹽課竈丁。一丁至三丁者每丁免田七十
畝。四丁至六丁者每丁免田六十畝。七丁至十
丁者每丁免田五十畝。十一丁至十五丁者每
丁免田四十畝。十六丁至十九丁者每丁免田
三十畝。二十丁者全戶優免。○正德五年議
准。陵戶墳戶雜泛差役。除正身外。准免二丁。其
餘人丁一體當差。○嘉靖九年題准。各該竈戶

內有舉人監生生員省祭吏役。照有司事例。一體優免。○又令查各陵墳園戶及佃戶。原額應該若干戶。照所屬州縣地方繁簡。遇編審均徭。分別等第。另僉更換。替下人戶。聽當別差。其那移戶。并定國公惠安伯佃戶。以免本身餘丁退出。與民一體當差。○十五年

詔各處帝王陵寢前代名賢及本朝公侯駙馬伯文武大臣勅葬墳墓。所在官司。照例編僉附近民人一丁看護。免其雜泛差役。其塋域所占地畝稅糧。一併除豁。○二十四年。議定優免則例。

京官一品免糧三十石。人丁三十丁。二品免糧二十四石。人丁二十四丁。三品免糧二十石。人丁二十丁。四品免糧十六石。人丁十六丁。五品免糧十四石。人丁十四丁。六品免糧十二石。人丁十二丁。七品免糧十石。人丁十丁。八品免糧八石。人丁八丁。九品免糧六石。人丁六丁。內官內使亦如之。外官各減一半。教官監生舉人生員各免糧二石。人丁二丁。雜職省祭官承差知印吏典各免糧一石。人丁一丁。以禮致仕者免十分之七。閒住者免一半。其犯賊革職者不在

優免之例。如戶內丁糧不及數者止免實在之數。丁多糧少。不許以丁准糧。丁少糧多。不許以糧准丁。俱以本官自己丁糧照數優免。但有分門各戶。踈遠房族。不得一槩混免。○二十八年議准陵園海戶量免人丁。不許將田畝折免。○三十二年。令查竈戶新買民田。不拘年月久近。畝數多寡。照例與民編派。○隆慶元年。令天下有司。查照優免舊規。量加從寬。定為限制。止免各人本圖戶下田土。其餘各圖各鄉。不准優免。其詭寄田地等弊。仍許自首免罪。○五年。令上

林苑海戶永樂宣德年間額設正德年間續補及係正身充當者准與全免差役若係添補量行優免三丁其餘丁產與民一體均編

婚姻

洪武二年令凡嫁娶皆由祖父母父母主婚。祖父母父母俱無者從餘親主婚。若夫亡携女適人者其女從母主婚。若已定婚未及成親而男女或有身故者不追財禮。其定婚夫作盜及犯徒流移鄉者女家願棄者聽還聘財。其定婚女犯姦經斷夫家願棄者追還聘財。五年無故不

娶及夫逃亡過三年不還者並聽經官告給執照。別行改嫁亦不追財禮。○凡招贅須憑媒妁。明立婚書開寫養老或出舍年限止有一子者不許出贅。如招養老女贅者仍立同宗應繼者一人承奉祭祀家產均分。如未立繼身死從族長依例議立。○凡男女婚姻各有其時或有指腹割衫襟為親者並行禁止。○五年令蒙古色目人氏既居中國許與中國人家結婚姻不許與本類自相嫁娶違者男女兩家抄沒入官為奴婢其色目欽察自相婚姻不在此限。○二十

六年定。凡民間男女嫁娶。不許同姓。及尊卑親屬相為婚姻。違者律有常憲。○永樂四年

詔北京山東等處人民。流移各處趁食。有將女憑媒禮嫁在處人民為妻已生男女者。保勘明白。仍許完聚。不必發回原籍。○正統四年。令武職不得與所管旗軍結婚。○十一年。令雲南四川貴州所屬宣慰宣撫安撫長官司并邊夷府州縣土官衙門不分官吏軍民。其男女婚姻皆依朝廷禮法。違者罪之。○弘治二年。令有許告服內成婚者。如親病已危。從尊長主婚招婿納婦。罪

止坐主婚免離異。若親死雖未成服輒嫁配仍依律斷離異。

讀法

洪武四年令凡

國家律令并續降條例事理有司官吏須要熟讀詳玩明曉其意。監察御史按察司官所至之處令其講讀。或有不能通曉者依律究治。○二十一年

賜天下武臣大誥令其子弟誦習。○二十四年令天下生員兼讀誥律。○二十五年

詔令各處官民之家傳誦

大誥三編。凡遇鄉飲酒禮。一人講說。衆人盡聽。使人皆知趨吉避凶。不犯刑憲。其秀才教訓子弟。引赴京考試。有記一編。兩編。或全記者。俱受賞。仍其實過名數。曉諭天下。○二十六年。令凡民間。須要誦讀。

大誥律令

勅諭老人手榜。及見下著業牌面。沿門輪遞。務要通曉法意。仍仰有司。時加提督。○永樂元年。令各處教官訓導。依前教讀講解。聽候考試。其市

井鄉村秀才一體用心教訓如不熟讀及聞知
考試推託不赴者治罪○十七年令各處軍衛
有司凡洪武年間一應榜文俱各張掛遵守如
有藏匿棄毀不張掛者凌遲處死○成化元年
奏准各處修蓋榜房將洪武永樂正統年間節
次頒降榜文謄寫張掛諭衆通知○四年奏准
各處有司每遇朔望詣學行香之時令師生講
說大明律及

御製書籍俾官吏及合屬人等通曉法律倫理違者
治罪○嘉靖八年題准每州縣村落為會每月

朔日。社首社正率一會之人。捧讀

聖祖教民榜文。申致警戒。有抗拒者。重則告官。輕則
罰米。人義倉以備賑濟。

大明會典卷之二十

大明會典卷之二十一

戶部八

倉庾一

國家設倉庾儲粟以贍軍賑民兩京直隸各布政司府州縣各都司衛所以及

王府莫不備具其收貯有時支給有數注銷有冊各有通例茲具列於後而分內外倉于前至預備倉常存二年之蓄以需緩急因附見云

京倉

京倉附

長安門倉

東安門倉

卷三十一
西安門倉

北安門倉

舊太倉一十一衛
永樂七年設

獻陵衛倉

景陵衛倉

昭陵衛倉

羽林前衛倉

忠義前衛倉

忠義後衛倉

義勇右衛倉

蔚州左衛倉

大寧中衛倉

錦衣衛倉

神武左衛倉

新太倉七衛 宣德年設

裕陵衛倉

茂陵衛倉

康陵衛倉

義勇前衛倉

大寧前衛倉

富峪衛倉

會州衛倉

海運倉六衛

宣德年間。即舊海子地設

泰陵衛倉

永陵衛倉

忠義右衛倉

寬河衛倉

燕山左衛倉

義勇後衛倉

南新倉八衛

永樂七年設

府軍衛倉

燕山右衛倉

彭城衛倉

龍驤衛倉

龍虎衛倉

永清右衛倉

金吾左衛倉

濟州衛倉

北新倉五衛

永樂年設

府軍左衛倉

府軍右衛倉

府軍前衛倉

燕山前衛倉

金吾前衛倉

大軍倉四衛

永樂年設

永清左衛倉

旗手衛倉

大軍倉

武成中衛倉

濟陽倉二衛

永樂七年設

金吾右衛倉

濟陽衛倉

祿米倉二衛

嘉靖四十一年。令改府軍彭城二倉之半為祿米倉。外東倉為衛倉。

內西倉為部倉

彭城衛南新倉、府軍前衛南新倉

西新太倉四衛

永樂年設

虎賁左衛倉

金吾後衛倉

府軍後衛倉

羽林左衛倉

太平倉二衛

弘治十七年設。正德八年。改鎮國府。十六年。仍改正。

留守前衛倉

留守後衛倉

大興左衛倉

永樂七年設

通州倉

四大運倉名。俱正統元年定。舊有大運東倉。後州于中倉。

大運西倉

永樂七年設

通州衛西倉

通州左衛西倉

通州右衛西倉

定邊衛西倉

神武中衛西倉

武清衛西倉

大運南倉

天順年添廠

通州衛南倉

通州左衛南倉

通州右衛南倉

定邊衛南倉

大運中倉

通州衛中倉

通州左衛中倉

通州右衛中倉

神武中衛中倉

定邊衛中倉

神武中衛東倉

舊屬大運

東。今併屬於此

順天府

壩上等二十三馬牛房倉

詳見後

南京

四十一衛倉 見南京戶部

應天府

常平倉

水次倉五處

天津左右三倉

永樂二年建。今一十八

德州常盈二倉

宣德五年建。今二十八

臨清廣積常盈三倉

永樂四年設。今四

徐州永福廣運二倉

永福。洪武元年建。廣運。永樂十二年

建。今四廢

淮安常盈一倉

永樂十三年建。弘治二

凡倉廩建置。洪武四年設軍儲倉二十所。各置

官掌管○二十八年置

皇城長安東安西安北安四門倉。每倉設副使一員○永樂七年置北京金吾左右羽林前常山左右中燕山左右前濟陽濟州大興左武成中左右前後義勇中左右前後神武左右前後忠義左右前後武功中寬河會州大寧前中富峪蔚州凡三十七衛倉及錦衣中懷來守禦二千戶所倉。每倉設副使一員○十三年令通州張家灣起蓋倉廩七十間名通濟倉收貯各處饋運糧○宣德六年令添置北京及通州倉○正

統元年定通倉名。在新城內者為大運中倉東倉。舊城內者為南倉西倉。○天順三年。令通州新城增置倉廩三百間。

凡管糧專官。永樂十三年。設淮安常盈倉。令戶部主事一員提督收放。○宣德三年。令在京各衛添設經歷一員。監收支糧。其內外衛所倉俱令各衛首領官與倉官專管。罷軍職管糧。○十年。令戶部郎中主事各倉場分管糧草。三年更代。○正統三年。令戶部侍郎一員同內官總督在京通州倉糧及提督象馬牛羊等房草豆。○

五年添設郎中主事五員分授提督德州倉并
象馬房等倉場收放○十年令總督在京通州
倉侍郎兼提督臨清徐州淮安等處倉糧○十
四年令內外各倉場監督收放糧草郎中主事
等官一年一代回日備開數目繳部仍將經行
卷簿相沿交割若有虧折欺蔽續差官員徑自
具奏○景泰三年令各倉監收官員嚴督官攢
庫斗人等修葺倉場開通溝渠其曠職坐視淹
沒糧草者拏問追陪○成化二年令戶部管糧
官提調官軍人匠修理倉廩仍令巡倉御史常

川點視○十一年。令京通二倉各委戶部員外一員定廩坐撥糧米。務令挨次不許徇情私。呂廩座○嘉靖九年題准。請

勅一道。齋付通倉坐糧員外郎。會同巡倉御史。督理運糧。其各總輕齋銀兩。照例驗給官軍。雇脚完糧。其通惠河成。扣省開運脚價。解送太倉。以備修河等項支用○萬曆二年。鑄給監督徐州淮安臨清德州天津倉關防

凡在倉員役。正統十四年。革大軍倉官攢軍斗多餘之數。止留大使一員。副使一員。攢典二名。

軍卒二十名○景泰三年革各倉場致仕武官
守把門禁止令辦事官一員管理○又令在京
并通州倉軍斗收糧不及三萬石者每十名內
摘撥五名回衛○又令各倉斗級庫子開寫年
甲鄉貫住址編造文冊候巡視官員點開○天
順七年奏准直隸淮安府常盈倉徐州廣運倉
各存留大使一員副使二員攢典二名斗級一
百名修倉夫匠二百名山東東昌府臨清倉存
留大使一員副使一員攢典一名斗級二十名
臨清廣積倉存留大使一員副使二員攢典二

名。斗級三十名。二倉共存留修倉夫匠二百名。各倉原設官攢等項多餘之數裁減。○成化二十三年。令京通二倉并淮安徐州臨清水次各倉場內官原設者存留。添設者取回。○正德十六年。令京通二倉水次倉

皇城各門京城九門各馬場倉場各

皇莊等處。但係正德年間額外多添內臣司禮監照弘治初年查叅取回。○又令臨清倉監督內臣止留見在二員。著廉靜行事。不許縱容下人。生事害人。以後不必添補。○嘉靖元年奏准。德

州原設修倉六止。僉五十名與臨清修倉夫。每名各徵銀二兩。臨清廣積二倉。額設斗級五十名與德州倉四十八名。每名各徵銀一十二兩。俱解臨德二州庫收。斗級就審該州有業人戶。應當按季給與工食銀。每年共一十二兩。修倉人夫。候戶部委官修理明文至日。陸續雇用。○三年議准。今後京通兩倉太監不許添設。○八年議准。裁革通倉把門各衛致仕千百戶等官。門軍送回原衛當差。查選該倉守支官攢軍斗老成精壯之人。分班把守。按季更換。○二十五

年議准羽林前等五十一衛倉每年該衛原僉
軍斗六名共二千四百八十名除見軍收糧外
其守支年分止選精壯軍斗四名同頂廩小甲
一名在倉看守錢糧餘二名退回原衛當差俱
停支月糧候挨陳坐放之時行取回倉眼同放
支不許投充影射占役違者查究其各倉但查
有剩糧二千石以下者即令盤併別廩或即令
支盡撥典遣歸省祭軍斗發回該衛○二十七
年議准各倉場監局商人照清理鋪行事例奏
差給事中御史各一員會同順天府堂上官督

同宛大二縣掌印官五城兵馬從公查審。分為上中下三等造冊二本。一存本府備照。一送戶部分發各司。遇有各倉場上納糧草等料。挨名順序派撥應役。以後仍十年一次審編。貧乏者除豁。富厚者增補。○萬曆七年題准裁革京倉經歷五員。通倉經歷一員。○九年題准臨德天津等倉委官三年一次盤驗明白。即將官攢照例起送。免其守支。

凡倉糧收支。宣德五年。今在京各衛倉每廩置牌一面。開所收糧數。并部運官吏。旗軍糧長。納

戶及收糧官攢斗級姓名於上掛廩門以便點
關○又令各處軍民運糧到京赴戶部告判該
司徑送本部委官處定廩收受轉行該衛用印
信下帖發該倉收納○六年令南京及淮安徐
州臨清各倉實收通關戶部刊印仍置號簿編
寫內外字號用半印空填年月每年量印幾千
道并外號簿發監收官執掌跟同該倉官攢查
明填寫實收米數給付納戶原籍官司告繳比
對查考○正統三年令各衛倉糧放支盡絕盤
有糠粃米塵給與屯軍糞田○景泰五年令京

倉納糧部運官遞串納戶領籌其揚米摯斛行
槩擡斛折蓆等項止許正設軍斗如納戶自願
雇人者聽○七年令京通二倉各處該納糙粳
米未完者准以陳米補納仍令該倉應時放支
不許存留○又令兩京東安等四門倉收剩餘
糧并篩揚不堪米數照光祿寺事例批寫數目
即令納戶領出該倉官攢刁難指留者治罪○
正德元年令

內府各監局各庫及各處倉場收受錢糧除舊例
該用鋪墊蓆藉等項該部查議定以數目取用

外。不許似前指以各項使用為由。勒要納戶財物。違者重治。○六年。令查京通二倉。見在木斛。取先年鑄降鐵斛較勘。合勺不差。原有印烙者。存留。無印烙者。補印。分送各倉用使。每年二月。內較勘一次。官攢斗級人等。如有仍舊通同增減。收放斛面者。從重究治。○十二年。令京通二倉監督員外郎。每月弔取各倉收卷簿查算。放支未盡糧米倉廩盡數造冊送部。并內外總督衙門查照。戶部將冊劄委坐糧員外郎挨次坐撥放支。坐盡倉廩。官攢起送軍斗回衛。○十六

年議准京倉收受糧斛照舊止令原委主事督收不許提督太監違例攘收納賄作弊○嘉靖八年議准各處運糧官旗納糧完日交納楞木板片鋪墊倉廩止令員外郎照樣收受如糧米在某倉板木亦在某倉務使京通二倉事體歸一收完具數呈遞總督衙門查考如有留難索要使用者聽外總督及巡倉御史叅究拏問○九年題准嘉靖八年取到兩淮餘鹽銀十萬兩候秋成米價頗平分投委官召買運赴徐淮二倉交收其嘉靖九年十年該銀二十萬兩候前

銀糴足再行支取。相時買納以便支運。如南北地方時歲豐歉不一。通融本折斟酌奏請。○十一年題准。京倉各廩盤出附餘陳腐黑豆豌豆等項雜糧。內頗堪食用者。量給兩縣孤老不堪食用者。送西苑水田培壅。○二十七年議准。壩上鄭家莊等處各倉場子粒銀。以後不許內臣收掌。俱著巡青科道驗發。附近州縣收貯。聽候倉場修牆支用。若有餘積。亦聽科道具數題發。戶部奏作馬匹草料。○萬曆七年定車戶車脚。在京東倉每石給銀一分六釐。西倉每石給銀

二分一釐。通州西倉西門。南倉北門。每石銀一分七釐。西倉南北二門。南倉東門。每石銀一分。中倉三門。每石銀七釐。

凡各倉禁例。宣德四年。榜諭各倉。凡收支糧草。官吏人等有折收金銀。并攬納偷盜者。許諸人首告。或拏送法司。正犯處斬。仍追原物入官。家屬發邊遠充軍。首告者賞鈔五十貫。○七年。今法司犯賊徒流雜犯死罪官吏人等。有力者。編充通州各衛倉斗級。如官攢軍斗人等。有偷盜。虛出等弊。許首告得實放免。仍賞鈔一千貫。若

通同偷盜作弊者加以重罪。逃走者發口外充軍。○正統七年榜諭各衛差委監支官軍月糧頭目。不許擅立大小把總名色及官攢人等通同作弊。違者令巡倉御史并戶部管糧官拏問。○景泰三年。令各倉官攢斗級人等。不許勒要納戶分例贖米地鋪及關糧人擡斛等項錢物。○四年。令各倉收糧官攢軍斗。不許小脚人等奪攬挑擔。如納戶自願雇倩者。每米一百石止許小脚二十名。○天順元年。令在京各倉場。凡把持誑騙。色攬坑陷納戶。攪擾倉場之人。許人

指實首告。連當房家小。發邊遠充軍。○弘治十二年奏准。凡京倉小脚歇家。營求在官指稱公用。為由索取固基等項錢物。及別項求索。許被害之人。赴總督及巡倉官處陳告。就於本倉門首枷號一箇月。軍發邊衛充軍。民發口外為民。干礙內外官員奏請定奪。○嘉靖七年議准。內外總督及京通巡倉御史。坐糧監收官員通行曉諭禁革。凡遇有指稱太監名目。勒索茶果等錢。各官攢斗級人等。索取常例銀物。生事刁難。聽各該官員并緝事衙門訪拏送問。枷號照例。

發遣干礙職官奏請處治○八年議准各處運糧官旗俱有

欽定限期江北到早江南來遲今後內總督及內監督衙門但遇運官違限不許指稱修理公廨鋪砌甬路擅自科罰一輓一銀違者聽總督尚書及巡倉御史叅奏○二十四年題准今後倉場事務緝事人役俱要遵奉

詔旨不許擅自干預如有機密重情亦要指有明証顯跡毋得輒以空言刑逼招承違者聽巡倉御史及科道舉劾究治

兩直隸府州縣都司衛倉

順天府

良鄉縣

豐濟倉

昌平州

居庸倉

黃花鎮倉

延慶倉

渤海倉

白羊倉

奠靖倉

鎮邊倉

廣濟倉

橫嶺倉

密雲縣

鎮邊城隆慶倉
墻子嶺廣盈倉

古北口倉
石匣倉

白馬關廣儲倉
曹家寨廣有倉

石塘嶺廣豐倉
大水谷廣積倉

涿州

常盈倉
陸樊倉

薊州

本州倉
三屯營倉
舊屬永平

預備倉
五重安倉

洪山口倉
大安口倉

羅文谷倉

青山營倉

黃崖口倉

漢兒莊倉

太平寨倉

遵化縣

永盈倉一

喜峰口倉

馬蘭谷倉

豐潤縣

豐盈倉

平谷縣

積留倉

將軍石營倉

豬圈頭營倉

熊兒谷倉

永平府

永豐倉

山海倉

界嶺口倉

劉家口倉

臺頭營倉

建昌營倉

黃土嶺倉

石門寨倉

燕河營倉

撫寧縣

撫寧倉

保定府

廣盈左右倉

唐縣

軍城倉

新興倉

易州

紫荆新城倉

惡石口倉

馬水口倉

大龍門陸壩倉

金水口倉

烏龍溝倉

白石口倉

葫荻口倉

十八盤口倉

孟良口倉

軍城倉

狼牙口倉

插箭嶺倉

吳王口倉

故關新城倉

橫河槽倉

娘子關倉

新泉關倉

白草溝口倉

倒馬關下城新興倉

河間府

巨盈倉

滄州

長蘆官倉

真定府

豐盈倉

定州

永豐倉

延慶州

本州倉

懷來廣阜倉

雲州堡倉

獨石廣積倉

長安嶺倉

赤城廣備倉

宣德十年置

鵬鶚堡倉

龍門廣盈倉

龍門倉

馬營廣盈倉

永寧縣

永寧倉

四海治倉

保安州

洗馬林堡倉

葛峪堡倉

新興倉

萬全廣積倉

趙川堡倉

萬全廣盈倉

永豐倉

懷安廣備倉

宣德倉

牀溝堡倉

宣政倉

宣化倉

膳房堡倉

北直隸衛

天津衛倉

天津左衛倉

天津右衛倉

延慶衛倉

涿鹿衛倉

涿鹿左衛倉

涿鹿中衛倉

密雲中衛倉

密雲後衛倉

薊州衛倉

東勝衛倉

遵化衛東店倉

鎮朔衛東店倉

萬全都司

洪州舊堡倉

大小白羊二堡倉

青遼常峪二堡倉

新開口堡倉

張家口堡倉

西陽河堡倉

新河口堡倉

兵儲倉

順聖川新城馬房倉

宣府在城倉

鎮安堡倉

青泉堡倉

松樹堡倉

君子堡倉

貓兒峪倉

上堡倉

伴壁店堡倉

三岔口堡倉

鎮寧堡倉

金家莊堡倉

牧馬堡倉

樣田堡倉

滴水崖堡倉

萬全右衛倉

萬全左衛倉

寧遠站倉

渡口堡倉

李信屯堡倉

羊房堡倉

沙城堡倉

雞鳴驛倉

保安新城倉

保安舊城倉

岔道城倉

靖胡堡倉

周四溝堡倉

黑漢嶺堡倉

東城倉

西城倉

蔚州城倉

廣昌城倉

深井堡倉

黑石嶺堡倉

萬億倉

龍門所倉

土木榆林二驛倉

南山岔東岔西倉

鳳陽府

本府倉

廣儲一二四倉

潁州

廣積倉

潁上縣

本縣倉

亳州

軍儲倉

泗州

廣濟倉

壽州

本州倉

宿州

際留倉

蘇州府

永豐倉

嘉定縣

吳淞江軍儲倉

太倉州

太倉軍儲倉

鎮海軍儲倉

崇明縣

永豐倉

松江府

青村倉

軍儲北倉

軍儲南倉

上海縣

廣儲倉

鎮江府

大軍倉

廬州府

永豐倉

六安州

軍儲倉

淮安府

大軍倉

常盈倉

東新倉

鹽城縣

永積倉

海州

通濟倉

永濟倉

邳州

邳州倉

揚州府

軍儲倉

儀真縣

廣實倉

高郵州

廣儲倉

興化縣

永興倉

通州

通濟倉

泰州

常豐倉

徽州府

永豐倉

寧國府

軍儲倉

池州府

豐濟倉

太平府

豐濟倉

安慶府

萬億倉

滁州

永盈倉

徐州

永成倉

永福倉

廣運倉

凡管糧專官。宣德八年添設萬全都司都事一員提督所屬衛所倉。○正統五年添設保德州判官一員於偏頭關倉監收支糧。龍門守禦千戶所吏目一員監收支糧。○九年添設戶部主

事於山海關提督收放兼巡視永平府界嶺口
劉家口喜峰口倉場○十一年題准將永平山
海界嶺口林南東店等倉令山海衛管糧主事
管理其遵化薊州喜峰等處糧草令總兵管理
及山東僉事協同參議兼管○景泰四年添設
山東按察司副使一員提督永平等處糧草兼
理屯田○天順元年添設戶部郎中一員於永
平山海薊州等處一員於宣府一員於大同俱
提督糧草○又題准於保安隆慶二州添除判
官二員聽巡撫郎中分定倉屬兼收糧草○八

年添設鳳陽府通判一員管理廣儲等六倉糧斛○成化二十三年革鳳陽府管糧通判仍留戶部主事一員御史一員巡視○弘治二年添設寧國府通判一員太平旌德二縣縣丞各一員管糧○十年令宣府鎮糧草調度主於郎中裁革主事○十五年添除通判八員銓注真定保定河間大名四府令前往宣府各倉場監督收放糧草○十八年題准紫荆等關倉場專差主事一員管理一年滿日照例更替○又專差主事一員於密雲居住整理邊儲○又題准紫荆

荆倒馬等關。照原差主事監督其密雲居庸等處。仍差主事三員整理糧儲。裁革添設通判三員。○嘉靖十年。令太倉兵備副使。兼理蘇松常鎮四府錢糧。○十三年。添設永平府通判一員。在於遷安縣適中處所住劄。專管薊州沿邊一帶錢糧。專聽戶部管糧郎中提調。○十六年。議准裁革永平府添設通判。及昌黎樂亭二縣主簿各一員。添設盧龍撫寧二縣主簿各一員。○十八年。取回北路居庸關東路古北口西路紫荆關等處倉場戶部分管委官。將附近薊州地

方密雲古北口石匣堡等處倉場分為東路屬
薊州郎中管理居庸紫荆倒馬等關并腹裏保
定唐縣易州涿州良鄉等處分為西路委戶部
郎中一員前去易州提督前項倉場○二十一年
添設宣大總督糧餉大臣一員○二十二年
差主事一員專理易州客兵糧餉○二十五年
議准各邊郎中主事差滿回日本部嚴加考察
在任果無贓私不職推姦避事過違限期等項
方許回司管事如或不惜名檢指實參論降黜
○二十九年添設蘇松常鎮四府管糧參政一

員列銜山東給

勅書關防督率所屬催徵解納○三十年題准易

州管糧主事專管戶部發去并各處解到主客

兵銀其召商買辦支放等項盡屬巡撫○三十

一年題准薊州召商買納糧餉俱聽巡撫處置

其監督主事止收掌稽查○三十二年題准密

昌管糧主事俱注選三年仍鑄關防二顆并請

勅書二道分給各官收領行事○三十七年裁省

昌平主事止註選郎中往來昌密總理○又題

准徐州兵備副使潁州兵備僉事各兼理糧儲

添入

勅內○四十二年題准昌平密雲建昌三處原設
管餉通判俱照宣大諸路事體各給關防○四
十三年添註貴州司郎中一員請給

勅書關防駐劄永平總理永平等處糧儲兼管屯
種○四十四年復設昌平主事管理三路兵馬
錢糧其管糧通判仍駐居庸併理三區關事密
雲郎中仍專理密雲糧餉○萬曆二年給昌平
管糧通判關防令兼理居庸關商稅○五年題
准各邊糧儲郎中有缺於員外郎主事內擇其

才守素優資俸相應者充任。俱候三年滿日預呈戶部移咨吏部選補一員前往交代。將任內經手錢糧逐一交盤明白回部聽候考察。中間果有廉能勤慎有裨邊儲者另行優錄。其怠肆不職者查訪得實不時議處。○八年裁革蘇松管糧參政一員。

凡在倉員役。正統三年革宣府大同各衛倉軍斗撥以人充當。○景泰四年令直隸通州左等四衛并直隸武清衛各倉每副使一員照通州衛倉事例止於撥軍斗一十五名。○嘉靖八年

議准添設豬圈頭營將軍石營馬蘭谷各倉副
使一員。漢兒莊營太平寨營。燕河營。石門寨營。
各倉大使一員。就令帶管附近熊兒谷黃崖口。
駐操營。大安口營。洪山口。伍重安營。臺頭營。義
院口。七處倉場。并令山海倉劉家口倉。喜峰口
倉。永寧倉。舊設官攢。就近帶管黃土嶺營。建昌
營。青山駐操營。羅文谷。四處倉場。

凡倉糧收支。嘉靖八年議准。凡專管倉分行永
順二府。將附近州縣稅糧民壯子粒。并各衛所
屯種米豆。坐派上納。以備各關營行月糧支放。

帶管倉分止派本處及附近關營米豆專備客兵支放。各倉場草束以十分為率。專管場分坐派七分。以備料折草。及主兵支放。帶管場分止派三分。專備客兵支放。攢典每倉各一名。看守斗級專管倉分。每年四名。帶管倉分并各場俱每年二名。○三十年題准。易州管糧官今後召商。即於沿河倉上納。聽沿河口石港口。東小龍門。天津關。天橋關。梨嶺。防守軍餘關給。○隆慶五年議准。順永二府所屬州縣。自隆慶六年為始。一應起存京邊稅糧馬草。并備邊子粒。衛所

關管屯米豆秋青馬草等項銀兩悉照議解赴
各倉場上納本色其中間應該起運各衙門并
存留額多用及協濟各鎮應給應扣者通候會
計目咨劄太倉銀庫照數扣除補給其沿邊倉
場攢典務要本地殷實人民取具干連保結方
許上納參充

大明會典卷之二十一